

古愚心言十二



善本

復高章之書二

乙亥河渚稿



慰問摯情溢於詞表詩二十章心識之矣僕五十九喪
妾亦非變故所以斷腸者生離死別夫妻子母天各一
方耳自顧無足比數不敢具述有河渚古愚哭內詞聊
以當狀展函覽及定爲潛然來書云廖樾阡造而未面
此君學行兩優與徐文亦堪伯仲硯田同寄 京華暇
時邀話亦道義之一資也憶丑闌僕卷爲太倉王醇叔
先生所賞以額置之嗣於赴洵日先生邀一見與至親
庶常同席語之曰所門序長至今孫子未太史認真先

生語僕甚感愧吾輩豈必連名千佛同年始有情哉奄
奄旅病乞骸無由達舍門下可與誰語兩次疾號并此
已三跂切跂切

寄高章之書

乙亥河渚稿

病况愁腸樾阡晤時想能言僕一子遠來省視惟畏人
知托稱外甥得相依爲幸何意天之机我近報荆妻逝
溘四十二年老糟糠貧苦患難靡有不共未嘗稍稍食
報無語永訣又旅人致其子在外不能見面兩大慙恨
此豈孫子荆哭內潘安仁悼亡所可擬一子南歸老人
旅病自顧自憐不得不思乞骸也然自顧自憐而無由
自達前書備悉其何以籌之乎知門下道義之孚乃不
覺其覩縷

寄廖樾阡書

甲戌河渚稿

僕愁人而無恨事惟於戊闈分校時佳卷未盡薦至今
餘憾無此而作誑語者有如此河近復春申浦君札云
承來翰知華亭孝廉廖樾阡半載尚未謁車騎式廬以
是見明府之賢益信樾阡之介也今秋值其兩尊人雙
壽一爵一書藉手使者到時煩遣妥役送雲間今錄此
札壽日代僕引滿爲二尊人祝賢郎先貽小品七篇字
字解頤僕出京時一切文字投諸水火畱此自怡悅家
書入長安紙尾道注意其文如珍其人如玉如其人如

其文僕心寫賢橋梓以此

寄鄭子偉書

甲戌河渚稿

五月禹服伺於國門凝眸薄暮六月門下訪諸江浦
從膝連朝又浙中徐文亦爲是科遺卷所愛士須殷見
疎獨於僕去時偕其學徒詣送黯然皆僕所心期而心
寫者也門下爲守部進士惟有耐貧樂道閉戶多讀書
眼界心胸他時自與俗吏迥別僕老矣千秋大業敢以
望諸同志者跂切跂切



復鄭子偉書

乙亥河清稿

經年書問屢致三千里外道之云遠悠悠我思九秋家
報語及內子之喪門下赴弔往復五百里青蠅中似多
一素心縞衣人也紫馭石苓僕私其從者力止之矣豚
兒奔歸已在居廬後歸見總帷中一尺之身七尺之軀
必不忍不守此苦塊計期想今請謝矣嗟乎悼亡惜逝
伉儷恒情獨至僕而糟糠之感百倍河渚古愚哭內詞
一冊奉覽行述以詞不以狀他日地下銘與誌古愚自
述之自誌之而不以乞諸人也性不喜乞人以文尤不

喜乞達人顯者之文而况患難貧窮艱苦又非他人之
文所能言門下覽及以爲誠非他人所能文言僕序而
誌墓可乎然卜地入石殊未易耳江南爲冠蓋行李之
藪浦又通衢家報邈若天外客尋鴻便亦邈若乃鄉門
以外雀盡可羅今令弟伴貢使回船附書寄豚兒到日
遣從者送至寒舍見面授手勿憚勿稽諸侯兒昭時以
不盡

寄黃但唯書

乙亥河渚稿

今日普天中寒袍最苦僕久嘗風味時時爲但唯繫念
龍懿男年翁假旋語及再致師帥公曰黃子但唯窮而
立志有廬陵真面目願年兄以子弟視之門下聞之應
知僕惓惓也僕誓戒不作札恃公同譜同官又同心也
未知念及吾但唯否罔念則殊悔破戒矣便羽可相聞
吉水宋賢楊誠齋易傳前乞公覓一部久未見寄想忘
之矣每閱載紀韓侂胄築南園屬誠齋先生爲記許以
掖垣先生曰官可棄記不可作夫掖垣不以一記易吾

輩案頭何可無先生集况易傳自序所言聞諸先儒先
儒聞諸三聖三聖聞諸天又何可無此書書只四本師
帥公倘不忘使人順道行李中可挾持也如門下先得
詢公有北來人藉手送河渚跋之望之比口惡况惟有
扶病上糧艘哭徐文亦旅觀痛心斷腸吾道中喪我良
友書到聞此不知淚下誰多耳

復張禹服書 乙亥河渚稿

舍姪南旋過浦來翰已得之矣春氣發而百草生區區
癸心何時何地而不朝陽聞門下新入紫微省卽以暇
得讀書報國爲賀想前札門下尚未見耳近聞邸抄知
貴鄉平陽地震欽奉現任在京官員准回寧家不必開
缺之 旨緬惟

聖恩顧復如父母不啻如天也凡爲臣子感激宜何如貴
宅闔門惠廸必吉回京遇便鴻一一相聞以慰僕惓惓
關切廖越千古道摯情親至河渚僕喜愧交集若詢旅

况病苦必能道及臨楮不贅

復張禹服書二

丙子河清稿

僕今歲若非疾痛顛連則此行請纓効力豈甘少出人下以僕而至於馬代身者病也以馬代身而僅僅兩匹者貧也然於二月人從家鄉來望日始得遣行以所聞大師三月十日方發比去役道聽始知爲二月三十日幸而短僱遄飛一十四日到京投狀次日得啓奏不致後期貧病蟻忱上達

宸聰者天也馬價騰貴承門下玉成與章之同一至誼又交馬時煩從者往復守候三日朝秣暮芻敬謹不懈主

賢使必佳言之心識